



ПАРИЖДАГИ МЕРОСИМИЗ

Айни кунларда Ўзбекистон халқаро исломшунослик академияси профессори, филология фанлари доктори Афтондил Эркинов Францияда илмий тадқиқот олиб бормоқда. У Париж шаҳрида жойлашган Инсоншунослик фанлари фондининг "Таклиф этилган профессор" дастури стипендиясини қўлга киритган. Ҳурматли олимимизнинг хориждан йўллаган мақоласи муштарийларимизни безътибор қолдирмайди, деб ишонамиз.

ТАҲРИРИЯТ

(Давоми 5-саҳифада)



ЕТТИКУН

ГЛОБАЛ ДИПЛОМАТИЯ, ИНДУСТРИАЛ ЮКСАЛИШ, ИЖТИМОИЙ АДОЛАТ ВА ИНСОНИЙЛИК

Яқунига етаётган ҳафта Янги Ўзбекистоннинг ички ва ташқи сиёсатида ўта муҳим, стратегик аҳамиятга эга ва миллионлаб инсонлар ҳаётига дахлдор бўлган тарихий воқеаларга бой бўлди. Давлатимиз раҳбари Шавкат Мирзиёевнинг иш графиги жуда тигиз ва кенг қамровли кечди: оғир саноатда янги даврни бошлаб берган Бекобод ташрифи, шарқона кадриятлар ва олий даражадаги дўстлик рамзи бўлган Қатар сафари, кексалар фаровонлигини таъминловчи инқилобий пенсия ислохотлари тақдироти ҳамда Европанинг энг ривожланган марказларидан бири – Италиянинг Тоскана вилояти делегацияси билан музокаралар.

Ушбу воқеалар занжири мамлакатимизда иқтисодий қудратни ошириш, прагматик ташқи сиёсат юритиш ва "инсон қадрини учун" тамойиллини ҳаётга изчил татбиқ этиш борасидаги ислохотлар мутлақо янги босқичга чиққанини намоёиш этди.

ОҒИР САНОАТДАГИ ТЕХНОЛОГИК ИНҚИЛОБ ВА ХАЛҚҚА ЕНГИЛЛИК

Президент Шавкат Мирзиёевнинг Тошкент вилояти Бекобод шаҳрига ташрифи мамлакатимизнинг саноат мустақиллигини таъминлаш йўлидаги улуғвор қадам бўлди.

Энг замонавий технологиялар ва оғир саноатни ривожлантириш орқали иқтисодий қудратни мустаҳкамлаш ҳамда ушбу бойлиқни оддий одамлар ҳаётини яхшилашга йўналтириш доимий равишда Давлатимиз раҳбарининг эътиборида.

Президент шаҳарга янги замонавий элект-

ропоездда келди. 192 километрик ушбу йўналиш йилига 300 минг йўловчига хизмат кўрсатади.

Вагонлардаги юксак қулайликлар (Wi-Fi, кондиционер, ногиронлиги бўлган шахслар учун махсус кўтаргичлар) аҳолининг узоғини яқин, оғирини енгил қилди. Бу экологик тоза транспорт улушини ошириш ва автомобиль йўлларидаги тирбандлиқни камайтиришга хизмат қилади.

"Ўзметкомбинат" АЖда қиймати 839 миллион долларлик Қўюв-прокатлаш мажмуасининг ишга туширилиши Ўзбекистон металлургияси тарихида янги даврни бошлаб берди.

(Давоми 2-саҳифада)



МУНОСАБАТ

КЎЗГА КЎРИНМАС

ХАВФ

ёхуд
бугун далада
қолдирган
пластигимиз эртага
дастурхонимизга
қайтиши ҳақида

Деҳқон ва фермер учун ер – жон, сув – қон, ҳосил – рўзгор. Биз бутун умримизни далада ўтказамиз, ундан нон, пахта, мева ва сабзавот оламиз, оиламизни боқамиз, юртимизни таъминлаймиз. Ерга меҳримиз шунчалик кучлики, унинг ҳар бир қаричини кафтимиздек таниймиз. Аммо дунё илми ана шу азиз тупроғимизга, сувимизга ва дастурхонимизга кўзга кўринмас янги бир хавф аста-секин кириб келаётганидан огоҳлантирмоқда. Бу хавфнинг номи – микропластик.

Бугун шу мавзунинг ҳар бир фермер тушундиган тилда очиб бермоқчиман. Чунки

ечим фақат катта шаҳарлардаги лабораторияларда эмас, балки бизнинг даламизда, ҳар бир деҳқоннинг кундалик қароридан ҳам бошланади.

МИКРОПЛАСТИК НИМА ЎЗИ?

Пластик ҳаётимизга шу қадар сингиб кетганки, усиз бир кунни тасаввур қилиш қийин. Полиэтилен пакет, сўғориш лентаси, мулча плёнкаси, ўғит қоғози, пластик идиш, кимёвий восита қутиси – булар далада ҳам, ҳовлимизда ҳам тобора кўпайиб бормоқда. Пластикнинг энг катта муаммоси шундаки, унинг аксар турлари табиий моддалар каби тез чириб, йўқолиб

кетмайди. Қуёш нури, иссиқ ва совуқ, шамол, ишқаланиш ҳамда ерга ишлов бериш таъсирида йирик пластик аста-секин майда бўлақларга парчланади.

Беш миллиметрдан кичик пластик зарралар одатда микропластик деб аталади. Бир микрометрдан кичик ўта майда зарралар эса кўпинча нанопластик деб юритилади, гарчи бу ўлчам чегаралари бўйича халқаро илм-фанда ҳали тўлиқ ягона стандарт мавжуд бўлмаса ҳам.

(Давоми 3-саҳифада)

ФАКТ

✓ Ўзбекистон Республикаси Президенти Шавкат Мирзиёев раислигида маҳаллаларга янги муҳит олиб кириш ҳамда "маҳалла еттилиги" фаолиятини янгича ташкил қилиш бўйича устувор вазифалар юзасидан видеоселектор йиғилиши ўтказилди.

✓ Дунёдаги энг йирик олтин қазиб олувчи корхоналарнинг янги рейтингига Мурутов кони иккинчи, Олмалик кон-металлургия комбинати бешинчи ўриндан жой олди.

✓ Ўзбекистон терма жамоаси 56-Халқаро физика олимпиадасида (IPhO 2026) муносиб иштирок этиб, тарихда илк бор 2 та кумуш ва 2 та бронза медалини қўлга киритди.

✓ Марказий банк ҳузурида Исломий молия кенгаши ташкил этилди.



ЁРУҒ ХОТИРАЛАР



БИР ОИЛА ТАРИХИ

Сўлим Фарғонанинг мунис бағрида
Бор олти ариқдан сув ичган қишлоқ.
Унда
Чорак аср мендан нарида
Болалигим чопар тўзғитиб тупроқ...

Эркин ВОҲИДОВ

Ака – суянчик, тиргак, маслакдош, шу билан бирга, тўғри йўлни кўрсатувчи шамчироқ. Халқимизнинг ардоқли фарзанди Эркин Воҳидов амакимнинг ўғли, қадрдон акам эди.

Ҳар бир оиланинг тарихи, ўзига хос сир-асрори бўлади. Воҳидовлар оиласининг ҳам ўз тарихи бор. Абдувоҳид бобомизнинг олти фарзанди бўлган. Хусусан, қизлари – Солияхон, Ўғилой, Лутфихон ва Ўғиллари – Ғафуржон, Чўянбой, Ҳомиджон. Аммаларимнинг туғилган саналарини билмайман. Ғафуржон опоқдадам 1900 йилда туғилиб, 1958 йилда вафот этган. Эсимда қолгани, у киши касал бўлганида

дадам уйга олиб келиб, парварош қилган, вафот этганида мен 12 яшар эдим. Аммаларимнинг ўғил-қизлари оламдан ўтганига ҳам анча бўлди.

Дадам Ҳомиджон ака 1917 йилда таваллуд топган. 1939 йилда оила қурган. Аям келин бўлиб тушганида 15 ёшда бўлган. Эркин акам уч ёшли бола бўлган. Тўйдан уч ой ўтиб дадам армияга кетган. Аям бирор ишни қилмоқчи бўлса, Эркин аканинг онаси Розия аяма: "Келиноий, сиз ҳамма нарсани биласиз. Мана бу нарсани қандай қилсам бўлар экан-а...", деб доим маслаҳат сўраган.

(Давоми 5-саҳифада)



САФАРДАН СЎНГ

ТУРКИЙ ДУНЁ КУТУБХОНАЛАРИ БИРЛАШМОҚДА

Бундан роппа-роса бир аср аввал Боку шаҳрида туркий дунёнинг 131 нафар фидойи зиёлисини бир даврага жамлаган илк тарихий Туркология курултойи бўлиб ўтган эди. Орадан юз йил ўтиб, бу ерда "Туркий дунё ҳафталиги" юқори савияда ташкил этилди. Дунёнинг 20 дан ортиқ мамлакатидан келган юздан зиёд олим ва туркологларни бирлаштирган халқаро анжуманнинг очилиш маросими ҳақиқий маърифат байрамига айланди. Унда иштирок этиш бир зиёли сифатида камина ходимингизга ҳам қувонч бағишлади.

(Давоми 2-саҳифада)



ВАТАН МАНЗУМАСИ

АМУДАРЁ ҚИЗИ

Ҳей, ўзгача олам, Амунинг қизи,
Қўшиқ қуйлаб, сени ёд этгим келди.
Бошқа бойлигим йўқ. Қаламим, сўзим...
Байрамда табриклаб, шод этгим келди.

Дийдоринг эслатар Аму соҳили,
Болалик. Тошлоқ йўл. Қумлар ёдимда...
Тўлқинларга кўз-кўз қилиб коқилин,
Бир қиз чопиб юрар менинг ёнимда.

Қушлар бор, булут бор, у эмас ёлғиз,
Гулчамбарлар тақиб ўйнайди хушвақт.
Қара, одамларсиз, машиналарсиз,
Соҳилда юргани – унинг учун бахт.

Зерикса, дарахтдан бир новда узиб,
Қум юзига сураат чиза бошлайди.
Қара, танидингми, Амунинг қизи,
Шу қиз менга ўхшар, сенга ўхшайди.

Қалбингни ёритсин муҳаббат тонги,
Гуллардан поёндоз тўшар баҳоринг.
Ўқиган сеvimли китобингдagi
Энг яхши қаҳрамон бўлади ёринг.

Муҳаббат тилайман ёмғирдай тоза,
Қўнглинга тушмасин ёлғоннинг изи.
Ўйнаб-қулиб яша, бахтиёр яша,
Ўмринг нурли бўлсин, Амунинг қизи!

Сарвиноз АЙТМУРАТОВА,
"Келажак бунёдкори"
медали соҳибаси,
Зомин семинари иштирокчиси



Қорақалпоқ тилидан Рустам Мусурмон таржимаси

